



三才圖會

雲間元翰父王圻纂集



潭濱黃晟東曙氏重校



地理七卷

吳門圖

姑蘇臺圖

虎丘圖

天池圖

玄墓圖

天平山圖

支硎山圖

穹窿山圖

洞庭山圖

馬鞍山圖

虞山圖

太湖圖

吳淞江圖

雲間九峯圖

三泖圖

嘉樹林圖

惠山圖

張公洞圖

善卷洞圖

玉女潭圖

蛟山圖

南岳寺圖

京口三山圖

齊雲巖圖

黃山圖

疊嶂樓圖


敬亭山圖

齊山圖

九華山圖

采石圖

吳門圖



三才圖會

地理

卷


吳門控三江五湖之勝號東南奧區越絕書吳大城闔閭
所築周迴四十七里陸門八象天八風水門八法地八卦
有穹窿玄墓虎丘靈巖洞庭諸勝西北九里後避唐諱改
虎爲武靈巖在城西二十四里吳王之別苑在焉有館娃
宮琴臺響屐廊西施洞山頂有池下瞰太湖望洞庭西山
滴翠叢碧如在白銀世界中洞庭卽包山在吳縣西南中
有林屋洞吳王使威靈夫人入洞十七日不能盡因得禹
書又曰林屋洞十大洞天之一也俱爲宇內絕景

姑蘓臺圖



姑蘇臺一名胥臺在姑蘇山越絕書曰闔閭起姑蘇臺聚
 材三年乃成高見三百里傳云麋鹿遊於姑胥卽此劉駕
 詩曰勾踐飲膽日吳王酒滿杯笙歌入海雲聲自姑蘇來
 李白詩云姑蘓臺上烏栖時吳王宮裏醉西施蓋傷之也

虎丘山寺圖




三才圖會

地理七卷

五

虎丘去州治僅數里中多小溪曲磴夾其間如抱月然其
最幽麗者莫善和靖祠噓青攢白外與天接其上有浮圖
叱漢杪下瞰姑蘓可一掌轉浮圖而南世傳生公講堂悟
石軒在焉軒側有劍池側立數千尺兩崖壁峭如剖水清
寒漉漉鳴下有鉅石環敞磅礴可羅胡床十數座千人中
有白蓮池白蓮挺挺華若丹碧又稍下小石路迤邐其間
泉益奇石益怪俄斗折突起松篁豁然則和靖讀書處也
吳王闔廬葬所中多金鳧玉鴈銅駝水精碧海丹砂諸物
嘗有白虎盤據其巔故名晉司徒王珣及弟珉俱宅於此

天池山圖



按圖經山距吳縣西六十里由絕嶺而上山半有池逾數十丈因名天池晉太康中常產千葉蓮華又名華山山上有石鼓石屋又有龜巢石秀屏虎跑泉蒼玉洞宋紹興中張漢卿嘗居此號就隱山




玄真圖

吳之山惟玄墓最僻而亦最奇面湖而險隩丹崖翠閣望之如屏又名鄧尉法華障其前銅坑青支迤邐其左游龍界其右岡連嶺屬詭狀異觀相傳郁泰玄壘此故以名山又萬峯和尚修乘其下故亦名萬峯其陽有萬峯塔院山多美箭蒼蔚崖巘間級石而上得浩公房湖閣閣下多高松風起則谷嘯水涌聲聞數十里其尤奇則在絕頂一登則洞庭諸山悉浮湖面山之麓有奇石甚詭麗綠溪至虎山橋橋亦在亂山中而六水繞出其下波聯震澤映帶不

已

靈巖山圖




三才圖會

地理七卷


靈巖山卽古硯石山在吳縣西二十里亦名石鼓山闔廬
養越美人於此上有兩湖續圖經云硯石山頂有三池一
曰月池一曰硯池一曰翫華池雖旱不竭蓋吳時所鑿也
山上舊有響屧廊其下有石室俗傳吳王囚范蠡之地又
有嶮村其山出石可以爲硯蓋硯石之名由此也吳郡志
云登山見太湖諸山在銀濤中亦宇內絕景館娃宮西施
洞響屧廊香水溪吳王井皆其跡也

天平山圖



天平山續圖經云在吳縣西二十里巍然特高群峯拱揖
蘓之鎮山也吳郡志云此山在吳中最高為首峯高聳端正
特立山皆奇石山半有白雲泉亦為吳中第一山頂正平
有望湖臺下有白雲寺宋叅政范魏公奏請賜名及公之
先隴在馬姑蘓志云在支硎南五里最多奇石古蹟有遠
公菴頭陀巖龍門大小石屋卓筆飛來諸峯望湖照湖諸
石

支硎山圖



支硎山吳地記云在吳縣西十五里晉支遁道林嘗隱此
山蘓志云平石爲硎山有平石又因支遁故以支硎號焉
山有石室溫泉及放鶴亭馬跡石皆道林盤桓處南有石
門尤奇特東趾爲觀音禪寺續圖經所謂中峯南峯皆其
山之別峯也

穹窿山圖




穹窿山續圖經云在吳縣西六十里越絕書云古赤松子採赤石脂處也吳地記云穹窿山東西二嶺相趨名曰銅嶺此山特高峻比陽山尤高其頂方廣可百畝半山有泉名法雨下注石堰可以灌田東下有盤石高廣丈許世傳朱買臣讀書臺穹窿寺在焉北有紫藤塢百丈泉海雲庵西有白馬寺海雲庵姚少師隱處

桐廬山圖




洞庭山在府城西一百三十里峙太湖中一名包山亦名
林屋山周廻一百三十三里重岡複嶺茂林平野間卷井
舍不異市邑又有上方下方石公龍頭金繹渡渚諸山縹
緲峯其林屋洞毛公壇桃花塢諸跡尤爲奇勝漢書云下
有洞穴潛行水底無所不通號爲地脉道書以爲第九洞
天

馬鞍山圖




馬鞍山在崑山縣北廣袤三里狀如馬鞍峯巒蔚秀極目
 湖海百里無所蔽山出玲瓏石梁沙門慧居此上有浮圖
 其陽有慧聚寺東偏有山神寺西有文筆峯山頂有華藏
 寺南有桃源洞北有鳳凰石及春風亭正統間知縣羅永
 年植柏千章名郎官柏


虞山圖



虞山在常熟縣西北爲縣之鎮一名海虞山越絕書巫咸所居又傳虞仲隱於此因名雖無峯巒而蜿蜒起伏畧如臥龍山麓有雪井維摩庵太公石屋傍有石洞西北爲拂水巖崖石陡峻水奔注如虹凌風飛濺最爲奇勝自南而西有昭真宮昭明太子讀書臺在焉又西有三番石與石城石門諸峯錯峙下有石壇周八十步

太湖圖





在吳郡之西南廣三萬六千頃中有山七十二襟帶三州

蕪湖一名具區一名笠澤一名五湖虞仲翔云太湖東通常也

長洲松江南通烏程霅溪西通宜興荆溪北通晉陵溇湖

東連嘉興毘溪水凡五道故謂之五湖今湖中亦自有五

湖曰菱湖莫湖游湖貢湖胥湖莫釐之東周三十餘里曰

菱湖其西北周五十里曰莫湖長山之東周五十里曰游

湖泆無錫老岸周一百九十里曰貢湖胥山之西南周六

十里曰胥湖五湖之外又有三小湖曰梅梁湖曰金鼎湖

曰東臯里湖而吳人稱謂則惟曰太湖云太湖有七十二


三才圖會 地理七卷 六
峯其發自天目迤邐至宜興入太湖峙爲諸山湖之西北
爲山十有四馬跡最大又東爲山四十有一西洞庭最大
又東爲山十有七東洞庭最大馬跡兩洞庭望之渺然如
世外卽之茂林平野閭巷井舍仙宮梵宇星布棊列馬跡
之北津里夫椒爲大夫差敗越處也西洞庭之東北渡渚
鼇山橫山陰山秦餘長沙山爲大長沙之西衝山漫山爲
大東洞庭之東武山北則餘山西南三山厥山澤山爲大
此其上亦有居人數百家馬跡之西北有若積錢者曰錢
堆稍東曰大岬小岬與錫山若連而斷舟行其中曰獨山

有若二鳧相向者曰東鴨西鴨中有三峯稍南大墮小墮
與夫椒相對而差小爲小椒爲杜圻范蠡所嘗止也西洞
庭之北貢湖中有兩山相近曰大貢小貢有若五星聚曰
五石浮曰茆浮曰思夫山有若兩鳥飛且止者曰南鳥北
鳥其西兩山南北相對而不相見見卽有風雷之異曰大
雷小雷橫山之東曰千山紹山曰曠浮曰東嶽西嶽世傳
吳王於此置男女二獄也其前爲粥山云吳王飼囚也有
若琴者曰琴山若杵曰杵山曰大竹小竹與衝山近若物
浮水齒可見者曰長浮瀨頭浮殿前浮鼇山相對而差小

者為龜山有二女娟好相對曰謝姑有若立柱巖薛玉柱
 稍却金庭其南為岷山為歷耳中高而旁下者筆格驤首
 若逝者石蛇有若老人立石公石虵石公石最奇與龜山
 龜山南北對面曰鼉山山旁曰小鼉山若螺者清浮二鼉
 之間若隱者見曰驚藍東洞庭之南首銳而未岐者曰箭
 浮若屋欹者曰王舍浮苧浮又南為白浮澤厥之間有若
 笠浮水面者曰蕩帽有逸於前後追而及之者曰猫鼠有
 若碑碣橫者曰石牌是為七十二然其最大而名者兩洞
 庭也

吳淞江圖






按吳淞江禹貢三江之一也一名松陵江其源自吳江長
 橋東流至尹山北流至甫里東北流至澱山北合趙屯浦
 又東合大盈浦又東合顧會浦又東合松子浦凡五大浦
 至宋家橋與黃浦合流入海是淞江洩大湖之水杭嘉湖
 與蘓松常同其利害者也開則六府均蒙其利塞則六府
 同受其害 隆慶四年巡撫海瑞借支軍餉及調取賑濟
 贖導河夫無碍錢糧委松江府同知黃成樂上海縣知
 縣張嶺等尅期開濬查勘舊蹟自王渡起至宋家港口共
 長一萬一千五百七十一丈闊三十餘丈今議減半開河

面一十五丈底闊七丈五尺深一丈五尺六寸共計用工
食銀六萬餘兩是歲大饑小民思盜自河工一興畚鍤雲
集不兩月而告成百姓至今尸祝之 今上萬曆十五年
以吳中歲遭水患奏請特設水利副使一員專管江南水
利駐劄松江是歲以河道副使許應遠來董其事出帑金
十萬佐修治費及至首濬吳淞然開濬未完而故道反塞
甚至斷流不一年盡爲平壤豈氣數之偶然抑人爲之未
盡與

雲間九峯



機山在府城西北二十里因郡人陸機得名山山下有村曰平原亦以機爲平原內史故也

鳳凰山在府城北二十三里據九峯之首延頸舒翼宛若鳳翥故名華亭有九峯爲邑之勝此其一也

橫雲山在府城西北二十三里一名橫山或云因陸機弟雲易今名山頂有白龍洞潛通澱湖深不可測

余山在府城北二十五里舊傳有姓余者養道於此因名東西二峯延亘數里招提蘭若隱見其中土宜茶有泉名洗心甚清冽

山在府城西北二十五里舊名神山唐天寶間改今


崑山在府城西北二十五里陸氏之先塋此後生機雲時人比之崑山出玉因以名山


干山在府城北二十九里舊傳吳干將鑄劍於此因名又以形如天馬亦名天馬山山南舊有圓智寺

簫山在府城北四十里舊以土宜竹箭而名下有駱駝墩干將試劍石又有玉竇泉雨華洞山形雖小而遊覽者衆小橫山在橫雲山東由絕頂至東北皆峯巒隱起壁立數

三才圖會
地理考
十一
何色盡赭遊人呼爲小赤壁畫壁斬然一罅如虎丘試劍
石狀前有石可踞坐下瞰小澗亦九峯奇絕處也


三峯圖





三泖在府城西南三十六里太史公云泖之爲言茂也晉
陸機對武帝三泖冬温夏涼圖經泖有上中下之名而舊
縣圖又以近山涇圓者曰圓泖近泖橋闊者曰大泖自泖
而上縈繞百餘里者曰長泖北有谷水一名谷泖或以爲
泖之異名自圓泖分流東絕沈涇塘爲橫浦入於顧會浦
沈涇又自北入大盈浦黃橋門斜塘石湖塘自大泖分流
古浦塘亦自圓泖分流俱合秀州塘今黃橋門塞水併入
斜塘勢湍悍東入潢潦涇遂爲黃浦

嘉樹林




嘉樹林

嘉樹林

嘉樹林

陳朝檜在松江府壽安寺殿墀左右陸龜蒙皮日休有重
 玄寺雙檜詩卽此宋政和間朱勗畫圖以進有旨遣中使
 取之一夕風雨震雷碎其一其一尚存葉夢得避暑錄以
 爲朱冲奉旨取平江白樂天手植檜與華亭悟空禪師塔
 前檜皆唐時故物按臨安志悟空塔亦有雙檜東坡詩所
 謂當年雙檜似雙童者乃在鹽官界石林蓋誤以靜安爲
 悟空也

慧山圖



慧山在無錫縣西七里數峯連綿雲林頗幽登之可望太湖有聽松閣漪瀾臺山下有靈池異花載在方志有真儒隱客遺事故迹一名九龍山陸羽謂山陽有九隴若龍偃臥其泉伏湧潛泄論者以為第二泉云


張公洞圖



周處風土記謂漢張道陵脩仙於此洞面西北其周五里
脣有石相距丈許上一石橫亘宛若門闕上皆飛巖峭壁
嵌空邃深駭人心目下數百步洞益空豁石壁三面儼如
堂宇其通明處可方數丈謂之天窓雜樹蒙翳天光下垂
傳爲吳赤烏中震霆所闢上石乳萬株異形詭狀不可摹
繪時有泉下滴人默承之出洞衣潔如故稍有言其滴處
遂痕歸必浣滌亦甚異也中一臺崇三丈面可坐百人俯
瞰冥宵足不能措臺南石刻張公洞福地五字道書謂天
下福地七十有二此其五十八也臺之下怪石紛錯欹者

倚者銳而出者却而後者顛而欲仆者拔而起者橫理者
端莊而拱者偃者夷者將斷而復續者與石乳皆蒼綠一
色傳染不逮又有如筍之植如鳳之騫如禽之怒而走饑
而噬蓋洞之妙至此洞西壁斜裂下多亂石其東一穴類
洞而小人不取入正南壁下其深黑處云可通後洞出洞
半里東折觀後洞門石頗隘又東南數百步會仙巖孤峯
側立數仞橫理若鑿昔有人見二叟倚石遯形而入因以
名巖其下空洞有泉出焉自右而趨潺潺有聲極可聽一
斷碑橫臥草際乃元延祐四年重修會仙亭記

善卷洞圖




善卷洞圖

善卷寺在國山東始於南齊建元蓋祝英臺之故宅也門有榜曰龍巖福地行松間數百步泉上有亭翼然曰湧金寺唐太宗十年七月所建柱礎刻字猶有存因名曰唐殿其制與今絕異寺之後亂石離立泉交流其間數十步至小水洞上飛崑突出巉峻可二十仞而大石翼其左右其中更有竇形類偃月深莫可測水由是出客投以瓦石輒闕然鳴李司空碑謂微時親見白龍騰出洞中蓋龍穴云水出洞潛行石下百步乃見其一南注經寺之鍾樓一東流至於寺門一自湧金亭南下與東流匯至玉帶橋入於溪

鄉之人資灌田甚利復由平地登山計二里許西北循石磴而上至乾洞右崖有刻字曰仙李巖下小洞如甕覘之無所見洞左峭壁百尺一古木葉類榆朴根緣壁下垂附石而出復產枝葉人不知其根也前有一石蹲踞爲洞之主峯左白象右青獅相向而立象之形垂而獅之形則昂以炬爍照之中有玉柱高可丈餘大六圍下圓而上銳光潔如玉卽唐張承吉所謂玉柱闕靈根者也石之白而方者高下井井儼如經畫曰仙人田瀦水尺許冬夏不枯洞北有丹竈可容三釜竈之後倚壁一石石上特伸一手巨

而且長色白如粉指甲宛然曰米堆鹽堆以形似名南有
仙床倚壁如今僧之禪床石色皆青紅黃白相錯復綠石
磴而下凡數百級則大水洞在焉水勢迅奔而其流由外
而內入於小水洞而止聲如震雷且不盈溢不知其何受
而何泄也由洞而進右一長石直亘於中左之長亘者比
右稍狹若爲洞之第二門自外窺內洞益高水益深左右
石皆碧色如肝肺倒垂者以四五百計聯屬不絕二洞上
下相承不爽尺寸如巍樓然亦天下一奇絕也乾洞前有
九斗壇山有九峯如覆斗故名梁武帝禱雨輒應寺之西
名國山山巔有封禪碑寺之後有二生堂唐李蟻宋李剛
李魯伯一姓而皆位至宰相沈石田詩所謂一姓轉身三
宰相者也堂右偏石室刻壁仙庵三大字李曾伯所書乃
祝英臺讀書處與梁山伯同事筆硯者舊有偃柏在寺前
如臥龍今已腐爛滅跡矣寺門西有玉帶橋唐李丞相舍
玉帶而建者又名勝義橋李曾伯書扁寺前有龍巖亭扁
亦李曾伯所書也善卷者卽舜讓天下與善卷而不受逃
之深山謂洞名以此

玉女潭圖



玉女潭在山半深谷中淳膏湛碧瑩潔如玉三面石壁下
插深淵石梁亘其上石上微竅日正中下射潭心光景澄
徹構重屋其上曰玉光閣亭曰靈應水伏流而南匯爲小
池爲亭其上曰凝玉凝玉之西一渠緣石旋轉可以流觴
曰流觴嶼古櫟一株根柯鬱蟠礪礪如石其下湍瀨潌洄
與樹映帶曰瓊樹湍激玉軒在焉湍流西下折旋而南屬
於灣碕石礪屬如龍馬下飲如砥柱中矗水奔注激射如
鬪再折而東水益駛石亦益奇天矯如虬蟠如鼉奮飛
噴薄濺沫成輪聲震盪如行峽曰虬鼉峽峽左石汎

沸玉橋而北地產美箭間以江梅曰梅竹隩琅玕所踰

寮在焉又北偃沼如初月曰生明池絕池爲梁曰隔凡橋
隔凡而上爲玉虎堂北出因山爲臺壇爽層出可以肆目
曰大觀廊廊之後爲周室又後爲雲著臺又其後爲環玉
岡雲著臺之左曰澄觀樓其前爲上元祠又前曰赤岡別
館爲護雲臺爲仙寓仙寓之南爲來仙橋由環玉岡而西
轉出玉女潭之後叢祠奠焉曰玉清祠祠右隙地白磔累
累散臥松竹間如群羊曰初平林西行百步巨石盤踞環
匝如墉曰盤玉隈西上繞出山椒曰縹緲亭亭下怪石林

立鯨騫獸伏競爲奇壯嘉木出石罅挺特修聳與石爭秀
曰琪樹峽西爲集靈谷又西爲飛雲洞自此緣石逕而行
曰瑤臺負臺爲室曰超宇宇後群石掀舞如花葉駢植聯
延如睥睨曰芙蓉城石之又奇者曰天成碑曰雨雷曰小
蒼屏曰青巖曰三珠洞曰二姑曰雙仙皆以狀類名而二
姑雙仙之間有期仙壑東下二百步爲文殊峯又東爲普
賢峯觀音巖在馬山自環玉岡而下林壑巖竇可名者二
十有三以其地在玉女潭之陽因名玉陽山而標其前曰
玉陽洞天玉陽洞天之東金晶巖最勝深廣十尋其中石

壁奇峭水出壁下平流兩涯交絡如織瀕水石坻可羅坐
十客水環之如玦巖石晶瑩日射之灼爍如金故云金晶
金晶巖之東稍南曰佛窟窟隘邃深詰屈不可窮其北爲
回陽洞上有畱仙橋踰橋而東爲鍾竇水激其中聲洪如
鏞玉陽洞天之西龍湫最勝淵潛澄湛中空如室石皆下
垂崕岈岈不可名狀其後石壁插水壁盡處有穴僅可
容舟欹仄以入中空如外室而通明虛敞石尤奇麗緣石
而上得穴甚隘偃僂而入轉出石室之上中空而下室石
柱合抱色正白如玉曰玉陽洞龍湫之西曰水犀洞石壁


幽峭水潛行而南出於南洞盤石之下曰浮盤浮盤之南
 爲君陽洞洞凡三穴最後一穴稍深曰白龍藏湍激若龍
 揭水跣行可環游出入彼此嘯呼與水聲相雜亦一奇也

蛟山寺圖




三才圖會 地理七卷 古
蛟山寺在無錫縣之東南鄉山在平田蜿蜒如蟠虬上有
萬松蒼翠茂蔚遠望之如碧雲焉寺甚幽山僧四五衆法
堂右臨絕磴架屋數楹制如舟名山舫下有竇乳一厥聲
淙淙於秋夜聽之尤宜傍有李忠定公祠

南岳寺圖



南岳寺在宜興縣南銅官山中四山廻合中一小山曰陽
 羨寺倚其麓頗荒寂惟修竹喬林飛泉恠石有足觀者產
 業歲修貢烏盧全詩云天子未嘗賜羨茶百草不敢先開
 花又有稠錫樹洗腸泉事亦不經詳見邑誌


京口三山圖



三才圖會

地理七卷

十五



北固山在京口城北下臨長江元和郡縣志謂其勢險固
 故名梁大同十年武帝嘗幸此山易名北顧自山之岡而
 登里許至甘露寺門內稍右有鐵浮圖十級唐李德裕觀
 察浙西時所鑄後燬于火今之浮圖宋元豐間鑄非唐舊
 也登觀音殿殿前長江在目茫無畔岸殿側崖下有秋月
 潭潭之右爲馬澗其水已涸庭下有鐵鑊二僧云梁武帝
 植蓮其中以供佛者山之巔爲多景樓把酒倚闌雲影墮
 江金焦兩山東西對峙如青螺列銀盤中最爲奇觀北下
 山足有石室深可丈餘名觀音洞山之半爲真武祠鞠塲

有狼石蘓文忠公謂寺有石如羊相傳諸葛孔明坐其上與孫仲謀論曹公兵事今此石絕不類羊而亦不在寺中鞠場之左有小水渟泓深碧名鳳凰池其上山石壁立可玩山南有天津泉 高廟駐蹕山中賦詩有甘露生泉天降津之句因以天語名之


金山在楊子江心其勝槩爲天下第一山下有石竝崎其前類雙闕然傳爲郭璞葬處泉曰中冷味極甘冽陸氏水品以爲東南第一水是寺曰龍游閣曰毘羅毘羅之南爲妙高臺上故有楞伽室宋眉山蘓公嘗書經於此北曰善

財樓大悲閣吞海畱雲二亭據山之巔登而四望江波渺然臺殿皆在其下令人神爽飛越亭南石刻妙高臺及玉鑑堂六大字稍下有塔基二南北相向蓋宋曾丞相布所建燬於火經觀瀾亭循石級西下歲久石多斷裂俯視江波如行天上足甚危慄巖曰祖師中肖唐裴頭陀像卽開山得金山因以名者也巖之右有洞深黑不可入有龍池旱歲禱之可致雲南左有龍王祠著祀與又有江山一覽烟雨奇觀二亭尤爲奇絕


焦山在府城東北九里峙江中卽古之浮玉漢末河東焦

隱士光隱此山故名有普濟寺門榜曰諸山第一峯徐武功筆也上山二百步巖上刻浮玉二大字乃趙宋人書又前一石橫出其刻字曰石屏與浮玉相對北折有江山壯觀亭三召洞洞石硤研容可數人中像隱士光在漢末嘗三召不起故洞名焉閣曰觀音閣前修篁叢立而金山雄峙其前尤爲妙絕東折爲吸江亭相傳其址舊爲浮圖洪武燬於火遂易以亭又東經焦山嶺爲大悲亭卽宋善財亭故址山之最高處也江波浩渺極目無際而雲樹風帆隱映遐邇又有自然菴面其前者汝山象山而象山去尤不遠瘞鶴銘在山之足石已崩裂墮江雖水落亦不復見古謂石有時而瀉信哉

白岳圖





白岳在徽州休寧縣一名齊雲巖自白岳嶺過桃源視下方平埜蒼然曰中和之亭過亭聽水聲冷冷曰桃花之礪礪南峭壁橫截一竇如剗刻作捲蓬大橋狀高員侷關一石楠扶踈如蓋直闕前曰東天之門入門飛巘嵌空多成乳竇二石龍循洞門游鬣如石甃然雜塑釋道應真與中曰羅漢之洞稍西龍洞脊有飛泉洒下入碧蓮池濺乃如珠曰玕珠之簾崖西石壁上有如虎跡者曰黑虎之崖度天梯嶺入玄武觀中坐玄君塑像道流稱百鳥啣泥以成似神其說也左峯爲石鼓右峯爲石鍾夾觀兩峯爲輦路



觀後高峯千仞白雲封之曰齊雲之巖且觀子立鑄鐵亭
 籠之曰香爐之峯觀西一小峯離立澗下曰捨身之崖踰
 浮雲嶺層巒刺天左龍右虎曰紫玉之屏峯側有石如虹
 臥泉一縷傍注為洗藥池者曰鵲橋之峯橋左巨壁崛起
 橫列如障穹然而樓閣其下曰紫霄之崖馴伏峯前昂首
 似欲長鳴而起者曰橐駝之峯丹楹桓礎架駝脊而築者
 曰無量壽佛之宮西北翠岫如螺髻者曰三姑之巖蒼顏
 黛色向文昌閣如矯首欲語者曰五老之峯朱閣隱隱扼
 山之吭曰西天之門山北向東西兩天門距可五里餘

黃山圖






黃山在宣歙境雄鎮東南山西之麓曰焦村蓬峯丹碧峭
拔攢蹙若植戟若側弁若列戈矛若芙蓉函蓄之初開雲
烟晴雨晨夕萬狀繇焦村南道二十五里至湯嶺仰視群
峯猶在霄漢間瀑布聲訇磕如雷怪石林立又十里爲祥
符寺寺前淙流走石間山皆古松名杉藤絡莎被翁夢龍
茸有靈泉自硃砂峯來依巖通二小池池瑩徹廣可七尺
深半之毫髮可鑿寺有南唐碑初名靈泉院宋祥符中改
今額有龍池奔流噴薄瀉石潭中亭午照燭五色璀璨寺
傍數峯凌空曰天都芙蓉硃砂其尤高者天都峯也又有

翠微寺寺庭有井泉此麻衣師卓錫處一峯卓然獨秀直
 峙東南隅曰翠微峯七十里至絕頂頂平廣倍尋環視數
 百里岡巒墟落歷歷可數又村北十里曰仙源觀林阜周
 密又踰巔而南眾岫疊嶺效奇獻秀盡在一覽又自橫
 嶺陟小丘道左竹杉陰森有潭曰白龍巨石豁豁洶湧衝
 激深不可測世稱黃帝與浮丘容成於此山上昇故名黃
 山

疊嶂樓圖



三才圖會
地理七卷
四十五
疊嶂樓在寧國府治陵陽山之第一峯晉謝玄暉之高齋也詩云結構何迢迢曠望極高深窓中列遠岫庭際俯遙林唐獨孤及重建更名疊嶂而高齋廢矣李太白詩云誰念北樓上臨風憶謝公後作郡者別建高齋於其麓以復謝公之舊別有正心樓在疊嶂之西麓甚宏爲江南第一樓云

敬亭山圖



三才圖會

地理七卷

四十五

敬亭山在寧國府西十里之霞石埠連峯如屏蒼翠鬱然
 晉謝玄暉守宣州時常登遊馬李太白獨坐敬亭山詩云
 衆鳥高飛盡孤雲歎去閒相看兩不厭只有敬亭山


齊山圖



三才圖會

地理七卷

四



齊山在池州府城南因唐刺史齊映得名山有仙人跡跡
巨而且長紋劃顯然捫蘿而上爲翠微亭林木森蔽禽鳥
飛鳴迴視下界真隔塵世臨九頃洞涉小九華則群石森
立其數與九華等故以九華名由招隱巖南望天門則石
耳諸山歷歷如指掌上青巖中有巒石塞道形如抱磬巖
右爲壽字巖仰視宋張時修所刻壽字不爽毫髮又自焦
筆巖南至妙空巖穹然空隆乳溜凝結紺翠蒼綠潤如過
雨妙空西上爲石鼓洞洞有石旁出如肺肝懸壁擊之鏗
然可諧絃管又傍一石與前石無異擊之若槁木竟不知

造化之逞奇於泉石若此也西爲仙人橋廣僅咫尺長五
 之竝跨兩崖膚理渾然不假人力三者於齊山爲最勝山
 之東有華蓋洞洞口石峙如門其中豁然上員如蓋下平
 如砥可坐數十人洞形九旋由大而漸入於小如螺尾然
 今之華蓋殿卽此製也

九華山圖



九華山在池州府青陽縣治南三十里舊名九子唐李白以山頂有九峯如蓮花易今名高數千丈南望石埭西望貴池北由五溪抵山麓紆徑險峻躋攀而上五里有湧泉亭稍上有半霄亭又三里有碧霄亭有大小天仙橋踰橋三里有望江亭長江如帶有懷賢亭四面嶙峋其中廣依山爲化城寺寺數百楹寺東爲太白書堂前爲芙蓉閣西爲陽明書院西南里許有神光嶺嶺有塔寺舊傳地藏仙神之後光如火焰故名塔寺西崖有松曰五釵惟一本嶺西五里有文筆峯下列芙蓉峯嶺之南上有古仙峯下有

洞深數里有石床石座或溪或崖入必以火東燕坐巖天賢臺龍女泉旁有白蟾穴稍南有平田岡金剛石幽勝奇觀塔東里許有東巖舊名捨身崖深無底止陽明嘗於絕壁題詩易今名又有邃谷巖巖有溪傍有石墩有東藏源源東爲中峯衆峯環外而此峯居中上睇日月下矚雲雨清泉迸石翠霧凝空中峯之上有甘露泉味冽甘美有浮桃澗會仙峯其下有大還嶺斧柯嶺舊傳二仙對奕故名其東有列仙峯齊雲嶺嶺南香林峯金光洞望之若有金色照耀北曰煎茶峯下有呈鳳嶺有懸水有飲猿潭淅淅

水流遶北麓有仙人峯舊爲李白書堂基今有甘泉書院
東北里許有鳧鴈峯有龍潭波流清澈色如蒼苔有綺霞
峯有合澗二水合流下瀉爲千尺泉有弄珠潭漚浮如珠
有赤壁峯下有集福橋西十里與中峯對峙有雲外峯有
思賢巖巖半舊爲滕司諫書堂有頭陀嶺肖人首爲王秘
書書堂嶺西有翠屏峯南有金沙泉其中爲無相寺東五
里有羅漢峯其下有雙峯舊有臥雲菴下有清漪潭有處
士巖清隱巖劉世疎嘗大書三字勒石有十丈洞石室四
圍松檜森秀前泓一溪南有葛仙洞高二丈餘洞口如甕

茫無畔岸有三游洞洞深邃有三曲有上下華池雙峯下
曰下華池泉其上肥產異茗有歸雲嶺有獨秀峯有野螺
峯有憤峯其下有觀音巖巖上有真人峯又東北十里折
而南爲廣勝寺有釣魚臺有雪潭流泉湧瀆狀類雪花深
不可測其下有瓔珞泉北有雲巖洞怪石凌空廣邃如堂
奇花茂卉爲九華絕勝傳有獵者逐鹿偶值其所再往不
可得有枕月峯月出從此峯而上又前有煉丹泉其上有
五老峯有獅子行道峯自廣勝東北十里有洪嶺嶺側有
虎跑泉東三里爲蓮花菴前有清水潭上有蓮花峯峯頂

有古松一本甚奇勝有石碑峯有招賢峯舊傳唐有隱者
讀書於此北有翠蓋峯五色蒼翠東有安禪峯梁杯度唐
道濟二禪師居焉有積稻峯勢如露困北有寶陀巖下五
里有幽谷爲廣福寺又五里有拾寶巖舊爲甘贄行者之
宅今爲圓寂寺其東有果老石伏虎巖舊傳伏虎禪師居
此巖下三里爲曹冲菴舊爲廣化寺又東上三里上有蓮
花峯有無極峯下有碧雲菴前有雲門峯上有碧雲峯峯
之半有石室西有螺髻峯靈龜石翠羽池百尺潭仙人塘
又東南二里爲淨信寺上有春陽臺沉磯石竝環瑰崛曲


北有黃匏城南去五里有覆盂峯有雙溪上爲福海寺前
有臥牛石西上五里有七布泉又上有九子峯其下爲寺
前有文殊峯拱神峯諸峯森列如衆星拱北有石照其側
有天井有垂雲澗關雞石如兩雞互啄有三斧石南上里
許有特峯又南五里有石崖石翁石池石泉竝崇崛清麗
爲翠峯寺絕巘有滴翠峯烟嵐濛霧翠色如滴廬黃敬亭
隱在望中有石碑峯下有透碧巖南下有菖蒲澗舊生蒲
一寸九節右側有昇雲峯下有潭旱乾不竭雲興卽雨有
翠微峯少微峯舊爲費拾遺書堂少微之北有碧玉泉天

香嶺舊傳唐詔起拾遺不就使臣懼其逸也焚香諭旨故名嶺側有風輪石有梅花峯有美人峯孤峯韜藏宛如淑女素粧西南五里有青峭巒諸峯秀拔面挹其勝有玉甌峯峯側有淨巾石北有雙石巖峭石雙聳夾道石壁插天流泉傾下嘗有異物出焉東有漱玉灘兩石峭聳一瀑前流如戛玉聲又有東陽澗有琉璃灘有雙闕峯凌空削壁險峻無極不可以上稍次有天柱峯如柱插天為淨居寺其側有展旗峯山如南去如旗幟然前有疊石塔歆而不傾鳥集不穢北有普賢臺嶺外有龍游澗下有嘉魚池池

中有石臺舊傳竇子明李化文釣魚於此下有流觴灘百丈潭又東南十里有雲峯絕頂有天池峯菱芡菰蒲不種自生有鳳樓峯其下有碧桃巖舊傳趙之微嘗種桃其間以會群仙有二神峯比肩如兄弟然下有黃石溪平田千畝水旱無患上三里有石菴西南有天台寺蹟下有鉢盂峯勝槩效目為化成寺東界又南十里勢聯九華有同山唐李化文墓有霞山翠嶽翹秀西南十里有白鶴山巖壑杳冥舊有白鶴真人廟貴池界東南五里有南陽山群巒積翠羅列如仙又三里有小魚龍洞由深谷而下有大魚

龍洞洞凡七洞口有水編筏秉燭乃可入內外有石肖獅
象鍾鼓仙侶蓮花棋局抵七洞有石竇日光射入石穴流
泉湧出劉夢得嘗愛終南太華以爲此外無奇愛女兒荆
山以爲此外無秀及見九華深悔前言之失也

采石圖



采石山在太平府城北二十五里昔人於此取石因名臨
江有磯亦曰采石唐李白嘗乘月與崔宗之自采石至金
陵著宮錦袍坐舟中卽此又牛渚山下有磯曰牛渚去采
石磯僅一里舊有險要備禦之地亦名然犀浦世傳下多
怪物晉溫嶠燃犀照之須臾見水族覆火奇形異狀或乘
馬車著赤衣幘其夜夢人謂曰與君幽明道別何意相照
卽此



